

Evening Dogri (NSD)

11-11-2025

खबरां

1. प्रधानमंत्री नरेन्द्र मोदी होरें आखेआ जे दिल्ली लाल किले आहली थाहर होई दी घटना दी साजिश रचने आहले गी बख्शेआ नेई जाग ते सारे ज़िम्मेदार लोकें पक्क गै सजा दिती जाग।
2. गृहमंत्री अमति शाह होरें दिल्ली धमाके दे मगरा उच्च सतह दी बैठक लाईए सुरक्षा सरबंधी स्थिति दा जायजा लैता।
3. बिहार च अज्ज विधानसभा चुनाए दे दुए ते अखीरले गेड तैहत वोट पाए गे संजा 5 बजे तगर 67 अशारिया इक-चार प्रतिशत मतदान दर्ज कीता गया।
4. भारत नै संयुक्त राष्ट्र सुरक्षा परिषद सोयां आंतकवाद च इस्तेमाल अवैध हथियारें आस्तै माली सहायता देने ते उनदी तस्करी करने आहले गी कदें बी नेई बर्दाश्त करने दी नीति अपनाने दा आग्रह कीता ऐ।
5. दिल्ली सरकार नै राजधानी च केंद्र सरकार दे ग्रेडेड रिस्पांस एक्शन प्लान - ग्रैप दा त्रिया चरण लागू करी दिता ऐ। 5मी जमात तगर दियां कलासां आनलाईन माध्यम राए होडन।
6. हंगरी मूल दे ब्रिटिश लेखक डेबिड स्ज़ेले होरें गी उनदे उपन्यास फ्लेश आस्तै इस वरे दे बुकर पुरस्कार आस्तै चुनेआ गया ऐ।



PM-Delhi Blast

प्रधानमंत्री नरेन्द्र मोदी होरें आखेआ ऐ जे नमी दिल्ली च कल होए दे धमाके दी साजिश रचने आहलें गी बख्शेआ नेई जाहग ते एहदे पिच्छे जिस कुसै दा बी हत्थ होआ ओहदे खलाफ कनूनी कार्रवाई कीती जाहग। अज्ज भूटान दी राजधानी थिम्पू च इक समारोह गी संबोधित करदे होई प्रधानमंत्री होरें आखेआ जे कल राती नमी दिल्ली च लाल किले कश होए दे धमाके दी जांच करा'रदिएं एजेंसिएं कन्नै ओहू संपर्क च न ते तहकीकात बारै पूरी जानकारी हासल करा करदे न। मोदी होरें आखेआ जे जांच एजेंसियां इस घटना दी तैह तगर जाडन ते एहदे पिच्छे दी साजिश दा पता लाइयै रौहडन। भूटान दे दऊं दिनें दे दौरे पर गेदे प्रधानमंत्री

होरें आखेआ जे तैहशुदा कार्जक्रम मुजब भूटान दे दौरे पर आए जरूर न पर उंदा दिल कल्लै दी घटना कारण मता दुखी ऐ।



PM-Bhutan

प्रधानमंत्री नरेन्द्र मोदी होरें अज्ज थिम्पू च भूटान नरेश जिग्मे खेसर नामग्याल वांगचुक हुन्दे कन्नै प्रतिनिधिमंडल स्तर दी गल्लबात कीती। प्रधानमंत्री मोदी हुन्दे आस्सेआ भारत-भूटान संपर्क गी मज़बूत करने आस्तै केई प्रमुख पैहलें दी घोषणा ते दोनें देशें बशकरा लम्मे चिरे आह्ले सहयोग प्रति भारत दी प्रतिबद्धता दी तसदीक दे फौरन मगरा एह बैठक होई। प्रधानमंत्री मोदी होर अज्ज बडलै दो दिन दी यात्रा पर भूटान पुज्जे। प्रधानमंत्री मोदी ते भूटान नरेश होरें पुनात्सां-गल्ल-दो पन बिजली परियोजना दा उद्घाटन कीता। भूटान यात्रा पर गेदे प्रधानमंत्री नरेन्द्र मोदी होरें अज्ज संजा थिम्पू च वांग छू नदी दे पश्चिमी तट पर स्थित प्रतिष्ठित किले ते बौद्ध मठ ताशिचो द्जोंग च भूटान नरेश ते महारानी नै सोआगत कीता। प्रधानमंत्री मोदी होरें भूटान नरेश ते महारानी हुन्दे कन्नै प्रार्थना कीती ते दीया बालेआ।



Shah Meeting Blast

गृह मंत्री अमित शाह होरें कार धमाके मगरा स्थिति दा आकलन करने आस्तै अज्ज अपने घर इक उच्च स्तरीय सुरक्षा समीक्षा बैठक दी अध्यक्षता कीती। बैठक च केंद्रीय गृह सचिव, खुफिया ब्यूरो दे निदेशक, दिल्ली पुलिस आयुक्त ते राष्ट्रीय जाँच एजेंसी दे महानिदेशक शामिल होए। जम्मू-कश्मीर दे पुलिस महानिदेशक बी वर्चुअल माध्यम कन्नै बैठक च शामिल होए। गृह मंत्रालय नै घटना दी जाँच राष्ट्रीय जाँच एजेंसी (एनआईए) गी सौंपी दिती ऐ। शैहर दे सारे संवेदनशील इलाकें च सुरक्षा निगगर करी दिती गई ऐ। विस्फोट दी वजह दा पता लाने ते जनता दी सुरक्षा यकीनी करने आस्तै अधिकारी मती सतर्कता बरत र दे ना। दिल्ली मेट्रो रेल कॉर्पोरेशन नै आखेआ ऐ जे सुरक्षा कारणें करी लाल किला मेट्रो स्टेशन बंद रहोगा। होर सारे स्टेशन सामान्य तौर पर कम्म करा र दे ना। कल लाल किले कश होए दे धमाके च 8 लोकें दी मौत होई गई ते केई होर घायल होई गए। दिल्ली पुलिस आयुक्त सतीश गोलचा होरें दस्सेआ जे लाल किला मेट्रो स्टेशन कश इक घट्ट रफतार कन्नै चला र दी गड्डी लाल बत्ती पर रुकी ते उस्सै गड्डी च विस्फोट होआ। दिल्ली पुलिस नै गैरकानूनी गतिविधें दी रोकथाम अधिनियम- यूएपीए विस्फोटक अधिनियम ते भारतीय न्याय संहिता दी बक्ख बक्ख दफाएं तैहत मामला दर्ज कीता गेआ ऐ। अधिकारियें कुसै बी आपात स्थिति च नागरिकें गी फौरी सहायता सुनिश्चित करने आस्तै आपातकालीन

हेल्पलाइन नंबर जारी कीते ना। दिल्ली पुलिस आपातकाल आस्तै 112, दिल्ली पुलिस नियंत्रण कक्ष आस्तै: 011-229 100 10 या 011-229 100 11, एल.एन.जे.पी अस्पताल आस्तै 011-232 334 00 ते आपातकाल 011-232 392 49, दिल्ली अग्निशमन सेवा आस्तै: 101, एम्बुलेंस आस्तै: 102 या 108 ते एम्स ट्रॉमा सेंटर आस्तै 011-265 944 05 ऐ। लाल किला वीरवारें तगर सैलानिएं आस्तै बंद रहोग।

<><><><><><>

Prez. Home Minister

राष्ट्रपति द्रौपदी मुर्मु होरें अंगोला सोयां केंद्रीय गृह मंत्री अमित शाह हुन्दे कन्नै फ़ोन पर गल्लबात कीती। सूत्रें मूजब, राष्ट्रपति होरें कल संजा नमी दिल्ली च लाल किले कश होए दे विस्फोट दे बारे च व्यापक जानकारी लैती।

<><><><><><>

Rajnath Singh Blast

रक्षा मंत्री राजनाथ सिंह होरें भरोसा दोआया ऐ दे दिल्ली कार विस्फोट दे ज़िम्मेदार लोकें गी न्याय दे कटघरे च आनेआ जाग ते उनें गी कुसै बी हालत च बख्शेआ नेई जाग। अज्ज नमी दिल्ली च दिल्ली रक्षा संवाद गी संबोधित करदे होई श्री सिंह होरें दस्सेआ जे प्रमुख जांच एजेंसियां इस घटना दी तेजिया कन्नै ते गहन जांच करा र दी ऐ। उने आक्खेआ जे जांच दे नतीजे तौले गै सार्वजनिक कीते जाडन। सिंह होरें इस दे च मारे गेदे सारे लोकें दे परोआर आहले प्रति संवेदना जाहिर कीती। राजनाथ सिंह होरें आक्खेआ जे दिल्ली रक्षा संवाद, रक्षा ते सुरक्षा दी बक्ख बक्ख चुनौतियें पर गहन चर्चा आस्तै इक प्रमुख मंच दे तौर पर उभरा र दा ऐ। उने आक्खेआ जे इस संवाद च समकालीन रूझानें गी समझने ते तेजी कन्नै बदला र दे वैश्विक माहौल दा आंकलन करने आस्तै नमे विचार सामने औन्दे ना।

<><><><><><>

Bihar Voting

बिहार च संजा 5 बजे तक 67 अशारिया इक-चार प्रतिशत मतदान दर्ज कीता गया। किशनगंज, कटिहार ते पूर्णिया च रिकॉर्ड 70 प्रतिशत सोयां मता मतदान होआ। किशनगंज च 76 अशारिया 2-6 प्रतिशत मतदान होआ ऐ। इस गेड़ तैहत 45 ज्हार थमां बद्द मतदान केंद्र बनाए गेदे हे। इस्सै चाल्ली सब्बै 20एं जिला मुख्यालयें च बी नियंत्रण कक्ष बनाए गेदे हे। महिला सशक्तिकरण गी बढ़ावा देने आस्तै 595 मतदान केंद्रें दा प्रबंधन पूरी चाल्ली

महिला मतदानकर्मी करा करदियां हियां। 21 दिव्यांग मतदान केंद्रें दे संचालन दा जिम्मा दिव्यांगकर्मी गी सोपेया गेआ। विधानसभा चुनां दे दुए ते अखीरी गेड़ च 3 करोड़ 70 लख थमां बद्द मतदाता 1 हजार 302 मेदवारें सियासी भाग्य दा फैसला कीता। वोटें दी गिनतरी 14 नवम्बर गी कीती जाहगा।

<><><><><><>

By Polls Voting

नगरोटा ते बड़गाम हल्के च मतदान होआ'रदा ऐ ते आधिकारिक आंकड़ें मुजब दपैहरी दे 5 बजे तोड़ी खरी मती गिनतरी च लोके मतदान कीता। नगरोटा असेंबली हल्के च 5 बजे तोड़ी 72.74 फीसदी लोके मतदान कीता ते बड़गाम असेंबली हल्के च दपैहरी दे 5 बजे तोड़ी 48.53 प्रतिशत लोके मतदान कीता।

<><><><><><>

India UN

भारत नै संयुक्त राष्ट्र सुरक्षा परिषद सोयां आंतकवाद च इस्तेमाल अवैध हथियारें आस्तै माली सहायता देने ते उनदी तस्करी करने आहले गी कदें बी नेई बर्दाश्त करने दी नीति अपनाने दा आग्रह कीता ऐ। लौहके हथियारें पर संयुक्त राष्ट्र च चर्चा दौरान भारत दे स्थायी प्रतिनिधि राजदूत पी हरीश होरें आकखेआ जे मुल्खै नै दहाके तक बन्ने पारा आंतकवाद कन्नै संघर्ष कीता ऐ, जिसे अक्सर अवैध हथियारें दी तस्करी कन्नै बढावा थहोआ ऐ। पाकिस्तान दा अप्रत्यक्ष तौर पर जिक्र करदे होई हरीश होरें चेतावनी दिती जे आंतकवादी गुटें दी लौहके हथियारें तक पुज्ज गंभीर वैश्विक खतरा ऐ जिसदा सामूहिक तौर पर हल कडुआ जाना लोडचदा।

<><><><><><>

Pak-Blast

पाकिस्तान च अज्ज इस्लामाबाद दे इक न्यायालय भवन दे बाहर होए दे आत्मघाती विस्फोट च लगभग 12 लोके दे मारे जाने ते 21 होरने दे घायल होने दी खबर ऐ। पुलिस मूजब एह विस्फोट न्यायालय भवन दे बाहर खडोती दी इक कार च होआ। पाकिस्तान पिच्छले किश बरें सोयां खैबर पख्तूनख्वा ते बलूचिस्तान प्रांतें च, सुरक्षा संबंधी समस्याएं दा सामना करा र दा ऐ। इस दौरान, पाकिस्तान मानवाधिकार आयोग नै खैबर पख्तूनख्वा च बिगड़दी

सुरक्षा ते मानवाधिकार स्थिति पर चिंता जाहिर कीत ऐ। ते प्रांत च डर त्राह, यक्कोतक्की ते नागरिक प्रशासन दे कमजोर होने दी स्थिति गी उजागर कीता ऐ।

<><><><><><>

Anti Pollution Curbs

दिल्ली सरकार नै राजधानी च केंद्र सरकार दे ग्रेडेड रिस्पांस एक्शन प्लान - ग्रैप दा त्रिया चरण लागू करी दिता ऐ। मुख्मन्त्री रेखा गुप्ता होरें आक्खेआ जे राजधानी च बददे प्रदूषण गी दिखदे होई दिल्ली सरकार नै सारे सुरक्षा उपाय बी रकीते गए न। श्रीमती गुप्ता होरें 5मी जमात तगर दे स्कूल हाइब्रिड मोड यानि ऑनलाइन ते भौतिक कक्षाएं पर संचालित होंडन। उने एहू बी आक्खेआ ऐ जे दिल्ली सरकार नै सारे विभागें कन्नै उने संभावित उपायें पर चर्चा कीती जेडी सरकार पुट्टी सकदी ऐ।

<><><><><><>

Green Production

नमी ते परतिए परतिए बरतोने आहली ऊर्जा सरबन्धी मंत्री प्रल्हाद जोशी होरें आक्खेआ जे सरकार दा मकसद भारत गी ग्रीन हाइड्रोजन दे उत्पादन, इस्तेमाल ते निर्यात दा वैश्विक केन्द्र बनाना ऐ। श्री जोशी होरें एहू गल्ल नमी दिल्ली च ग्रीन हाइड्रोजन पर त्रिए अंतर्राष्ट्रीय सम्मेलन दे उद्घाटन सत्र दौरान आक्खी। उने आक्खेआ जे ग्रीन हाइड्रोजन गी छडा इक विकल्प नेई सगुआं आर्थिक तौर पर जरूरी समझेआ जाना चाईदा। उने आक्खेआ जे राष्ट्रीय ग्रीन हाइड्रोजन मिशन दे तैहत सरकार दा मकसद नवीन तकनीकें दा विकास करना ऐ श्री जोशी होरें आक्खेआ जे भारत दा मकसद पर्यावरण अनुकूल मूल्य श्रृंखला ते हाइड्रोजन अर्थव्यवस्था च अगुवाहू बनने दा ऐ। उने आक्खेआ जे भारत दी ग्रीन हाइड्रोजन यात्रा कन्नै पूरी दुनिया गी फायदा होगा।

<><><><><><>

SC nithari

सुप्रीम कोर्ट नै निठारी हत्याकांड कन्नै जुडे दे आखिरी लंबित मामले च सुरेंद्र कोली दी दोषसिद्धि गी अज्ज खारिज करी दिता। मुख्म न्यायाधीश बी.आर. गवई हुन्दी अध्यक्षता आहली पीठ नै कोली दी सुधारात्मक याचिका स्वीकार करदे होई आक्खेआ जे उसी पैहले गै ऐसे 12 होरने मामलें च बरी कीता जाई चुके दा ऐ। अदालतै अपने 2011 दे फैसले गी वापस लेई लैता जिसदे च उसदी दोषसिद्धि गी बरकरार रखेआ गया हा ते कुसै होरने मामले च वांछित नेई होने पर उसी फौरी रिहा करने दा आदेश दिता गया हा।

DMK Protest

तमिलनाडु च सत्तारूढ डीएमके ते उसदे गठबंधन सहयोगी मतदाता सूची दे विशेष गहन पुनरीक्षण प्रक्रिया खिलाफ पूरे राज्य च विरोध प्रदर्शन करा'रदे ना। विधानसभा चुनाव नजदीक औने दे कन्नै राजनीतिक नेता अपना विरोध जाहिर करा'रदे ना। इस प्रदर्शन च सांसद, राज्य विधानसभा सदस्य ते जिला ओहदेदार हिस्सा लै'रदे ना।



Booker Prize 2025

हंगरी मूल दे ब्रिटिश लेखक डेबिड स्ज़ेले होरें गी उनदे उपन्यास फ्लेश आस्तै इस वरे दे बुकर पुरस्कार आस्तै चुनेआ गया ऐ। एह घोषणा लंदन च आयोजित इक समारोह च कीती गई। उ'नेगी इसदे थवा पैहले 2016 च उनदे उपन्यास 'ऑल दै मैन इज़' आस्तै बुकर पुरस्कार आस्तै चुने गेदे नाएं दी सूची च शामिल कीता गया हा।



Security-Katra

दिल्ली च कल राती होए दे कार धमाके दे बाद जित्थे पूरे मुल्खै च संवेदनशील इलाकें च सुरक्षा बधाई दित्ती गेदी ऐ, उत्थे गै रियासी जिला प्रशासन नै श्री माता वैष्णो देवी यात्रा दे आधार शिविर कटडा च बी निगरानी ते सुरक्षा बंदोबस्त पुख्ता करी दित्ते ना। एहदे कन्नोकन्नी आले-दोआले दे क्षेत्रें, जित्थे सैलानिएं ते श्रद्धालुएं दी आओजाई लग्गी दी रौहंदी ऐ, उत्थे बी सुरक्षा ते सर्तकता बधाई दित्ती गई ऐ ते हर नकलोहरकत पर नेड्डी तक्क रक्खी जा'रदी ऐ। आकाशवाणी दे जम्मू संवाददाता नै जानकारी दितती ऐ जे समूलचे जम्मू प्रांतै च हाई अलर्ट जारी ऐ ते यात्रिएं ते आम नागरिकें दी सुरक्षा लेई सुरक्षा एजेंसिएं गी हाई अलर्ट पर रक्खेआ गेआ ऐ। महत्वपूर्ण थाहरें पर नाके लाइयै औने-जाने आहलें ते गड्डिएं दी तपाशी लैती जा'रदी ऐ। माता दे भवन, कटडा रेलवे स्टेशन, बस अड्डे ते होरनें थाहरें जित्थे लोकें दी आओजाई मती रौहंदी ऐ उत्थै सुरक्षा बधाई दित्ती गेदी ऐ।



Security-Udh.

उधमपुर ते डोडा जिले च बी सुरक्षा बवस्था निग्गरी करी दित्ती गेदी ऐ। जरनैली शिडक ते शैहरै दे अंदरले इलाकें च बाददू तैनाती करियै भीडभाड आहले इलाकें च निगरानी रक्खी जा'रदी ऐ। संवेदनशील इलाकें च विशेष जांच नाके लाइयै औने-जाने आहलें कोला पुच्छ-गिच्छ ते जांच कीती जा'रदी ऐ। जिला प्रशासन नै सभनें सुरक्षा इकाइयें गी लोकें दी सुरक्षा यकीनी बनाने लेई मता सौहगा-सतर्क रेहियै कम्म करने लेई आखेआ ऐ। तोआई, डोडा जिले च बी कल्लै दे दिल्ली कार धमाके दे बाद एहतियात दे तौरा पर सुरखा बधाई दित्ती गेदी ऐ। सार्वजनिक थाहरें ते सैलानी थाहरें पर मती सतर्कता बरती जा'रदी ऐ। कनून बवस्था बनाई रखने लेई पुलसै दी गश्त बी बधाई दित्ती गेदी ऐ।



J&K Ranji

जम्मू-कश्मीर दी इक क्रिकेट टीम नै बल्लेबाज कामरान इकबाल दे शानदार शतक दी बदौलत दिल्ली गी 7 विकटें कन्नै हराया। एह जम्मू-कश्मीर दी रांजी ट्राफी क्रिकेट च दिल्ली ज्जेई जबरदस्त बरोधी टीम खलाफ पैहली जित्त ऐ। 179 रन्जें दा पिच्छा करदे होई जम्मू-कश्मीर गी खीरी ध्याडे जित्तने आस्तै 124 रन्ज लोडचदे हे। ओपनर इकबाल हुंदी 147 गेंदें च 133 रन्जें दी पारी नै जम्मू-कश्मीर गी जित्त दोआई। 1960 दे मगरा हुनै तोड़ी दिल्ली ते जम्मू-कश्मीर बश्कार 43 बारी मकाबला होई चुके दा ऐ जिंदे च 37 मुकाबले दिल्ली दी जित्त उप्पर खत्म होए। जम्मू-कश्मीर दे आकिब नबी गी शानदार प्रदर्शन आस्ते 'मैन ऑफ द मैच' घोषित कीता गेआ।

